

Jondi pepa timen youkuk

Yodakale Mede

Jondi pepa timen i youkuk ginen ijon adi nemek mebi lufomdok youkuk. Timen adi kayonbop yehitubulodaune Baŋ Bepaŋ eŋ mihinj Jesu Kilisto dut welekubugon tiŋa hatidok. Tiŋa undugon mambip diniŋ mebopdi yalaŋ yeniŋkamandaan yanagilune Bepaŋ mu bikabunenŋdok youyemguk.

Mambip diniŋ mebop heki adi indin yoiŋ. Nemenemek kwetfolon ijon ikiin hogohogok adi momohi hinek moon. Kaŋ Jesu adi Bepaŋ mihinj, unduŋ doktiŋa me hinek mintaan metam indi tiyam unduŋ nemenemek kwetfolon diniŋ dut tuwot mu wooŋ kadiwek. Adi indin yoiŋ. Me nediyeŋ Bepaŋ dut momoŋ hinek hatibe kaŋ nemenemek kwetfolon diniŋ wendok mu nadiluwaak. Unduŋ doktiŋa titiŋ momohi undihi yehikeledok mu nadiyaneen. Unduŋ doktiŋa kayonbopdi mede undihidok magi kametnadi mu taneenŋdok Jondi wendok maan yolak. Tiŋa indin yolak. Jesu adi me hinek mintaguk, kaŋ metamdi Jesu nadisukilitimiginj. Undugon welehidki Bepaŋ kahile hinek tiŋa metam noli maan welehidki yabukahile hinek tiyaneen.

Jesu adi mede kabup hakukdi miŋgon mintadakaleguk

1 ¹Koomkwaha tububihit ginen tububihila hatitalabuguk, kaŋ magitnikdi nadigumun eŋ daunikdi kagumun, tiŋa didimeniŋgon hinek kaŋ kohonikdi wehemikumun, u mede hatihatiniŋ uŋakon. ²Hatihati u miŋgon mintadakaleguk kaŋ indi kagumun, doktiŋa wendegon yohautayam. Tiŋa indi adi hatihati dapmandapmanŋnit mokit wendok-ku yobihila hanyam on. Adi koom Baŋdut hatiguk ala miŋgilanŋgon mintadakaleune kagumun. ³Indi nemek kagumun be nadigumun uŋakon hidi maan hanyam. Unduŋ tinene welekubugon mintanimbune kubugon hatidok yonŋ hanyam. Unduŋ tiŋa indi Baŋ eŋ Mihinj Jesu Kilisto adut welekubugon tiyam. ⁴Kaŋ indi nadifodi tuwot hinek tinimbek yonŋ pepa i youhamam.

Bepaŋ adi hauta

⁵Indi Jesu Kilistodi mede ninimbune nadigumun uŋakon indibo hidi hanyam. Mede u indin, Bepaŋ adi hauta. Adi'walaŋkade mambip-kabe

nemu hatak. ⁶Ale indi mambip gineŋ hatiŋila Bepaŋdut welekubugoŋ tam, unduŋ yonene medenik u yalaŋ tibekneŋ. Tiŋa undugoŋ mede biyagoŋ u mu kame hatiyam tilak. ⁷Ne hauta gineŋ hatilak undugoŋ indi maan hauta gineŋ hatiyaneem, wendok indi Bepaŋ'walaŋ metamŋiyedut welekubugoŋ kedem tiyaneem. Kaŋ Bepaŋ Mihinŋ Jesu Kilisto'walaŋ nanŋatŋinŋdi kadakaninŋnik hogohogok youtelune walanda tiyaneem. ⁸Indi kadakaninŋnik moŋ, unduŋ yoŋa adi welenik tikamanda timiyam, kaŋ mede biyagoŋ wendi welenik gineŋ mu hatak. ⁹Ingoŋ indi kadakaninŋnik yobihitnene Bepaŋ ne yoguk unduŋ, titiŋ didimeniŋ tiŋa kadakanin hogohogok indi foloŋ hatak u tumolokulaŋa nihiyoutewalanda tilak. ¹⁰“Nu kadakanin nemu tugut”, unduŋ nobuniŋ yoŋa kaŋ woŋ adi “Bepaŋ adi yalaŋ-me” unduŋ niyam tilak. Wendoktiŋa Bepaŋ'walaŋ mededi welenik gineŋ mu hatak.

Kilisto adi Tubulodanik

2 ¹Wapmihineye,^a hidi kadakanin tineeneŋ doktiŋa mede i youhamulat. Ale nebek niŋdi kadakanin tiŋakaŋ tubulodanik eŋ yahehewenik niŋ Baŋdut hatilak, u Jesu Kilisto. Adi yadi titiŋ didimeniŋ hogok tugukdi tilak, adi nadisukilitimiluwaak. ²Adi negoŋ indi'walaŋ kadakaninŋnikdok kibikoŋ tiŋa Beu Bepaŋdut welekubugoŋ tiŋa nihikiukuk. Adi kwanai u indi nihitubu-lodadok hogok mu tuguk. Mokoŋ. Adi yadi metam hogohogok kwetfoloŋ hatiŋ wanakaŋ yehitubu-lodadok nadiŋa tuguk.

Bepaŋ'walaŋ mede didimeniŋgoŋ kamehatidok

³Indi Bepaŋ'walaŋ yodoko mede kedem takalinŋakaŋ indinŋ hinek nadinim, “Indi adi agaŋ nadimihinakayam.” ⁴Be me niŋdi indinŋ yobek, “Nu Bepaŋ agaŋ nadimilat,” ingoŋ Bepaŋ'walaŋ yodoko mede mu takalilak, me woŋ adi yalaŋ-me, eŋ mede biyagoŋ u welenŋ gineŋ mu hatak yodok. ⁵Eŋ me nediyenŋdi Bepaŋ'walaŋ mede nadiŋa takalilak adi yadi welenŋdi bedinaditombune biyagoŋ hinek Bepaŋ kahileeŋ adut kadiŋa hatilak. Titiŋ unduŋ tiŋa nadine biyagoŋ Bepaŋdut wooŋ galiŋa hatiyam tilak. ⁶Be me niŋ adi “Na Bepaŋdut galiŋa hatilat,” unduŋ yoŋakaŋ Kilistodi hatiguk wendok tuwot hinek hatiluluwaak.

Hauta gineŋ hatidok

⁷Notneye, nu yodoko mede kobuli mu youhamulat. I yadi komi, koomkwaha tububihila nadigiŋdi naditalabiŋ unŋakoŋ. Mede

^a 2:1 Jondi “wapmihineye” fee yoguk adi bulaniŋgoŋ nadiyemiŋa mu yoguk. Adi yadi me gawadaŋ hinek nadisukiliti diniŋ talitimenŋ doktiŋa metam Jesu'walaŋ kayoŋbop nadisukilitinit adi welenŋdi yabukahile hinek tiŋa yoguk.

hanindidime koom tigiŋ wondok-ku yodoko mede komi hanilat oŋ.
⁸Kaŋ mede youtat i yadi yodoko mede kobuli iŋgoŋ tilak, wendi Jesu'walaŋkade be hidi'walaŋkade wanakaŋ noŋgoŋ folooŋnit tilak. Woŋ adi mebi indiŋ: mambip agaŋ dapmawe tulune hauta folooŋdi agaŋ miŋgilanŋgoŋ hautaŋ hatak.

⁹Me niŋdi “Na hauta gineŋ hatilat” yolak, iŋgoŋ me noliniŋdok nadikadaka hati-timilak kaŋ, me woŋ adi mambip gineŋ kougoŋ hatilak ninidok. ¹⁰Eŋ me niŋdi me noliniŋ welenŋdi kahileeŋ not timilak, adi yadi hauta gineŋ hatilak. Kaŋ hauta gineŋ uŋoŋ nemek niŋdi tubugweheyeune kadakaniniŋ titiŋdok nemu hatak. ¹¹Iŋgoŋ me niŋdi me noliniŋdok nadikadaka timilak, adi yadi mambip gineŋ hatilak. Adi yadi mambip gineŋ hatilak doktiŋa mambipdi dawi teheune talik deŋak kelelak u mu nadidakalelak.

¹²Wapmihineye, Bepaŋdi Kilisto wou foloŋ kadakaniniŋhik agaŋ tumolokuhamguk. Unduŋ doktiŋa mede i youhamulat.

¹³Baŋ heki, hidi me koomkwaha tububihit gineŋ hatigukdi hatilak u nadimihinaka tiŋ, doktiŋa mede i youhamulat.

Mekuyahi, hidi fafaŋe tiŋa Me Kadakaniniŋ ulatifogiŋ, doktiŋa mede i youhamulat.

Wapmihineye, hidi Bepaŋ nadisukilitimihinaka tiŋ, doktiŋa mede i youhamulat.

¹⁴Baŋ heki, hidi me koomkwaha hatigukdi hatilak u nadimihinaka tiŋ, doktiŋa mede i youhamulat.

Mekuyahi, hidi saŋiniŋhinit, kaŋ Bepaŋ'walaŋ mededi welehik gineŋ fafaŋeniŋ hinek halune fafaŋeŋ Me Kadakaniniŋ agaŋ ulatifogiŋ. Unduŋ doktiŋa mede i youhamulat.

Kwetfoloŋ diniŋ titiŋdok nadigalika mu taneeŋ

¹⁵Hidi kwetfoloŋ diniŋ titiŋ be nemenemek hogohogok u yabunadigalika mu taneeŋ. Nebek niŋ kwetfoloŋ diniŋ titiŋdok nadigalika tilak adi yadi Bepaŋ mu kahilelak. ¹⁶Indi a nadiyam. Kwetfoloŋ me diniŋ titiŋ hogohogok adi indiŋ: siloda tiŋa weleyouyout eŋ nemek yabunadigalika eŋ nehitoŋ nadiune loune foko titiŋ. Titiŋ undihi hogohogok woŋ adi Baŋ'walaŋkade mu biŋ. Mokoŋ. U yadi kwetfoloŋ diniŋ titiŋ hogok. ¹⁷Eŋ kwet tiŋa kwet diniŋ siloda be nadigalika kadakaniniŋ u adi liwedapmaŋ tineeŋ. Iŋgoŋ me nediyenŋdi Bepaŋ'walaŋ medeŋiŋ takaliwaak adi yadi hatihati dapmandapmaŋnit mokit kahileeŋ hatibaak.

Jesu'walaŋ memikniŋye agaŋ mintaŋ hatiŋ

¹⁸Wapmihineye, ya dapmandapmaŋ nai agaŋ nihitubu-dulalak. Unduŋ doktiŋa hidi koom Jesu'walaŋ Memikniŋ mintawaak yobu

nadigij u aganj kobuk feegonj mintaan hatitawiij. Kanj wendoktiņa ya aganj dapmandapmanj naidi nihitubu-dulalak, unduj nadiyam. ¹⁹Timen meheki u indut hatiņa binibiņa ugiņ. Ingonj adi indi'walaņ mebop gineniņ hinek mokoņ. Adi indi'walaaniņ mebop gineniņ biyagonj hinek binemek adi indut ingonj hatiyanim. Adi binibugiņ doktiņa aganj miņgonj mintadakaleiņ, meheki hogohogok adi yadi indi'walahi hinek mokoņ.

²⁰Hidi Uņgoniņ Molomdi Munabuli aganj ugolohamguk. Unduj doktiņa hidi wanakanj adi nadinadihinit hatiiņ. ²¹Hidi mede biyagonj u mu nadidakaleiņ unduj yoņa pepa i mu youhamulat. Mokoņ. Hidi adi mede biyagonj u aganj nadiiņ doktiņa pepa i youhamulat. Tiņa undugonj, hidi aganj nadiiņ. Mede yalaņ hogohogok adi mede biyagonj gineņ nemu mintaan bulak. ²²Yalaņ-me u neditok niniņdok? Me nediyeņdi “Jesu adi Kilisto mokoņ,” unduj yobune me uņakoņ yalaņ-me niniņdok. Me mede unduj yoiņ adi yadi Baņ eņ Mihi sigilulum tiyemiij, wendoktiņa adi yadi Jesu'walaņ memikņiye yenindok. ²³Me nediyeņdi Mihidok sigilulum timilak, adi yadi Baņ maañ sigilulum timilak. Eņ me nediyeņdi Mihi nadisukilitimilak, adi yadi Baņ maañ nadisukilitimilak.

Uņgoniņ Munabulidi mede folooņ ninindidimelak

²⁴Mede koom nadigij u welehek maaneņ boi-fafaņeeņ hatiyaneeņ. Hidi unduj tiņa Mihi eņ Baņdut galiņa hatiyaneeņ. ²⁵Kanj Jesu Kilisto ne hatihati dapmandapmanjnit mokit nimdok yofafaņeguk u uņakoņ.

²⁶Na me yalaņ haniņkamanda tiņ adi'walaņ titiņhik wendok hanimbene mede i youhamulat. ²⁷Ingonj hidi adi Kilistodi Uņgoniņ Munabuliņiņ ugolohambune hidut uņgonj hatilak. Kanj hidi nadinadidok baniņ be tiij doktiņa nebek niņdi hanihehitubu-didimewek, u mokoņ. Uņgoniņ Munabuli ne nemenemek hogohogok u aganj hanihehitubu-didimelak. Unduj doktiņa mede woņ adi yalaņ moņ, mede wa biyagonj. Ale hidi Munabulidi hanihehitubu-didimelak wondok tuwot Jesu Kilistodut galiņa hatiyaneeņ.

Bepaņ'walaņ wapmihi hatiyam

²⁸O Wapmihineye, hidi Kilistodut galiņa hatiyaneeņ. Ala adi miņgonj mintadakalewaak nai uņaniņ indi wanakanj fafaņe tiņa yatneem, tiņa undugonj mekanit mokit adi dawineņ yayatdok munta mu tineem. ²⁹Hidi “Kilisto'walaņ titiņņiņ u didimeniņ” unduj nadiņa kanj indij maañ nadiyaneeņ. Metam hogohogok titiņ didimeniņ tiij adi yadi Bepaņ'walaņ wapmihiņiye mintaiņ.

3 ¹I kaneņ! Me Baņ adi inditok uņgoniņ hinek nadiņa welenđi hinek nibukahile tuguk. Unduj tiņa ne'walaņ wapmihiņiye hinek niniņguk. Kanj biyagonj hinek Bepaņ'walaņ wapmihiņiye hatiyam. Metam nadisuhik nemenemek kwetfoloņ hatak wendok hogok kameiņ

adi Jesu mu nadimiŋgiŋ. Unduŋ doktiŋa indi maŋgoŋ mu nadinimiŋiŋ. ²Notneye, nai indidegoŋ indi Bepaŋ'walaŋ wapmihiniye hatiyam. Iŋgoŋ kougoŋ dedinŋ hatineem u miŋgilanŋoŋ hinek mu mintadakalelak. Eŋ Kilisto adigili miŋgoŋ mintadakalewaak kaŋ indi miŋgoŋ hinek kaneem. Tiŋa ne dabugoŋ yageleneem, u adi agaŋ nadiyam. ³Metam hogohogok Kilisto minta-dakalewaakdok nadinadiŋjila woomiŋiŋ, adi yadi welehiŋ tubuwalanda tiŋa woomiŋiŋ. Unduŋ tiŋa Kilisto ne walaniŋ hatilak undugoŋ adi maŋ walaniŋ hatiŋiŋ.

⁴Me nediyeŋdi kadakaninŋ tilak adi yadi Bepaŋ'walaŋ yodoko medeŋinŋ lahutak. Kadakaninŋ adi yodoko mede lahulahut diniŋ titiŋ. ⁵Hidi agaŋ nadiŋiŋ. Kilisto adi kadakaninŋ tumolokutdok mintaguk, tiŋa adi yadi kadakaninŋnit mokit hatiguk. ⁶Me nediyeŋdi Kilistodut wooŋ galiŋa hatilak, adi yadi titiŋ kadakaninŋ diniŋ talik mu takalilak. Nebek niŋ titiŋ kadakaninŋ diniŋ talik takaliune kaŋ me u Kilisto mu kaguk yodok, eŋ Kilisto mu nadimilak yodok.

⁷Wapmihineye, tiyaugene nebek niŋdi haniŋkamanda tibaakneŋ ala nadinadiŋjila hatiyaneeŋ. Nebek niŋ titiŋ didimeniŋ kelelak adi yadi me didimeŋ niniŋdok. Adi yadi Jesudi hatihati didimeŋgoŋ hatilak undugoŋ hatibaak. ⁸Sadaŋ adi koomkwaha tububihila kadakaninŋ tugukdi tihatilak. Unduŋ doktiŋa nediyeŋdi kadakaninŋ tilak adi yadi Sadaŋ'walaŋ me. Bepaŋ'walaŋ Mihiniŋ adi Sadaŋ'walaŋ kwanai tubukadakaŋ liliwenekutdok miŋgoŋ mintadakaleguk. ⁹Nebek niŋ Bepaŋ'walaŋ wapmihiniŋ mintalak adi yadi titiŋ kadakaninŋ mu keleeŋ hati tilak. Bepaŋ'walaŋ Hatihatidi welenŋ gineŋ tokiŋa hatak doktiŋa adi titiŋ kadakaninŋ mu keleeŋ hati tilak. Mokoŋ. Adi yadi Bepaŋ mihiniŋ hatilak doktiŋa kadakaninŋ tuwot mu tiluwaak. ¹⁰Indi Bepaŋ'walaŋ wapmihiniye deŋak eŋ Sadaŋ'walaŋ wapmihiniye deŋak, u mebihik titiŋ indiŋ foloŋ kanadi titiŋdok: Me nediyeŋdi titiŋ didimeniŋ mu tilak, adi yadi Bepaŋ'walaŋ moŋ. Tiŋa undugoŋ, me nediyeŋdi Bepaŋ'walaŋ metam welenŋdi yabukahile hinek mu tilak, adi maŋ undugoŋ Bepaŋ'walaŋ moŋ.

Welenikdi kihakile hinek tiyaneeŋ

¹¹Koomkwaha tububihila mede indiŋ naditalabugiŋ. Indi molomolom hinekdi me noli u welenik hinekdigoŋ yabukahile titiŋdok. ¹²Kein adi Sadaŋ'walaŋ mihi mintaaŋ kwayaŋ ulukumunŋguk. Unduŋ doktiŋa indi adi'walaŋ talik mu keledok. Kaŋ maŋgoŋ doktiŋa kwayaŋ ulukumunŋguk? Mebi adi indiŋ. Ne'walaŋ titiŋniŋ adi hogoli, eŋ kwayaŋ'walaŋ titiŋniŋ adi didimeniŋ. Unduŋ doktiŋa ulukumunŋguk.

¹³Notneye, meeniŋ nadinadihiŋ nemenemek kwetfoloŋ iŋoŋ hatakdok hogok kameiŋ, meheki undihidi memik tihambune hidi boho mu tineeŋ. ¹⁴Indetok indiŋ nadiyam. Indi notniye welenikdi yabukahile tam wendoktiŋa kumuŋ bikabuŋa agaŋ Hatihati kahilegumun. Eŋ meeniŋ

nediyen̄di noliņiye welen̄di yabukahile mu tilak, adi yadi kumuņ diniņ titiņ gineņ kougoņ hatilak. ¹⁵Me niņdi noliņiņ niņ welen̄di kahile hinek mu tiņa welen̄ gineņ nadikadaka timilak, woņ adi me u ulukumulak unduņ tilak. Kaņ hidi a nadiiņ. Medi me niņ ulukumulak, adi yadi Hatihati Momooņ dapmandapman̄nit mokit u tuwot mu kahilewaak.

¹⁶Jesu adi indi nihitubu-loda doktiņa hatihatiniņ bikabuņa kumuņguk. Kaņ titiņiņ wendi me notniye yabukahiledok titiņ u ninindidimeguk. Doktiņa indi maan̄ notniye yehitubu-lodadok hatihatiniņ bikabuyaneem.

¹⁷Me niņ adi nanaņe bombon̄ duhuduhunit hatiņa me noliņiņ niņ nemenemekdok baniņ tihatilak, u kaņ me noliņiņ wondok bulaningon̄ mu binek nadimilak adi Bepaņ'walaņ welesilon̄di me wendut mu hatak yodok. ¹⁸Wapmihineye, indi me notniye mededi hogok mu yabukahiledok. Mokoņ. Indi adi kohonikdi eņ welenikdi titiņ folooņ hinek tiyaneem.

Bepaņ'walaņ mede tiloloņ tiņa muntanit mokit hatidok

¹⁹⁻²⁰Indi me noli yabukahile hinek tiņa kaņ, indi agaņ mede biyagoņ takaliyam unduņ kedem nadinim. Ingoņ nemek niņdi welenik gineņ hali du me undiniņ ninimbihilune fiit Bepaņ namanda gineņ welekulema foloņ hatiyaneem. Indiiņ doktiņa: Bepaņ adi nemenemek hogohogok agaņ nadidapmalak, tiņa undugoņ nadinadiņiņdi welenik maaneņ nadinadi hatak u kalakapmedapman̄ tilak.

²¹Notneye, welenikdi nemek kadakaniiņ nemu binek ninimbihitak, nai uņaniņ adi indi Bepaņ namanda foloņ fafaņe tiņa hatiyam. ²²Tiņa indi adi'walaņ yodoko mede u takaliyam, eņ titiņ adi titiņdok nadilak undugoņ tam. Unduņ doktiņa indi maņgoņ niņdok ninadiyam woņ adi kedem nilak. ²³Adi'walaņ yodoko mede adi indiiņ. Indi Mihiniņ Jesu Kilisto wou u nadisukilitimiyaneem. Unduņ tiņa yokwambundaguk unduņ, indi molomolom hinek me notniyedut kihakile tiņa not momooņ tiyaneem. ²⁴Nebek niņ Bepaņ'walaņ yodoko mede takalilak, adi yadi Bepaņdut wooņ galilak, kaņ Bepaņdi adut buņa galilak. Bepaņdi Uņgoniņ Munabuli ninguk, kaņ Munabuli wendi Bepaņ indut hatilak u ninimbihilu nadiyam.

Munabuli mebimebi hatiiņ u yabukolodi titiņdok

4 ¹O notneye, polofet yalayaļ feedi mintaāņ kwetkwet hatidapman̄ tiiņ. Unduņ doktiņa hidi me niņdi buņa “Nu Bepaņ'walaņ Munabulidi mede naniņak,” unduņ hanimbune hidi adi'walaņ mede mu nadisukilitiyaneē. Mokoņ. Hidi adi toboniņ munabuli u biyagoņ Bepaņ'walaņkade be bulak, be mokoņ u kanadi taneē. ²Hidi titiņ indiiņ foloņ Bepaņ'walaņ Munabuli kaņ nadidakaleyaneē. Me niņdi “Jesu Kilisto adi me hinek mintaguk,” unduņ yobune nadiyaneē, Bepaņ'walaņ

Munabulidi adut hatilak. ³Eŋ me niŋdi Jesudok mede yodakale undiniŋ nemu tubune kaŋ, munabuli woŋ adi Bepaŋ'walaaniŋ moŋ, unduŋ nadidok. Woŋ adi Kilisto'walaŋ memikniŋ diniŋ munabuli yodok. Adi kwetfoloŋ mintawaak yobune nadigiŋ, u agaŋ uŋakoŋ mintalak.

⁴Wapmihineye, hidi Bepaŋ'walaaniŋ, eŋ Uŋgoniŋ Munabuli hidigut hatilak wendi kwetfoloŋ diniŋ munabuli'walaŋ saŋiniŋniŋ kalakapme tilak. Unduŋ doktiŋa polofet yalayalaŋ hekidi tuwot mu hehitubu-gweheyegiŋ. ⁵Polofet yalayalaŋ heki adi kwetfoloŋdok gigit. Unduŋ doktiŋa medehik yoiŋ adi nemenemek kwetfoloŋ hatakdok yoiŋ. Kaŋ metam nadinadihik nemenemek kwetfoloŋ hatak wendok foloŋ wapum hatak adi hekiyeŋ medehik nadiyemiŋ. ⁶Iŋgoŋ indi adi Bepaŋ'walahi. Unduŋ doktiŋa metam nediyeŋ Bepaŋ nadimiŋ heki adi yadi indi'walaŋ mede nadinimiŋ. Eŋ me Bepaŋ'walahi moŋ adi yadi indi'walaŋ mede mu nadinimiŋ. Titiŋ unduŋ foloŋ Munabuli mede biyagoŋ diniŋ eŋ munabuli yalaŋ diniŋ, adi'walaŋ mebihik kedem nadidakaleyam.

Bepaŋ welenikdi kahileeŋ kaŋ me notniye maŋ yabukahileyanem

⁷Notneye, indi molomolom hinek me notniyedut kihakile tiŋa not momooŋ tiyanem. Me noli yabukahile u yadi Bepaŋ'walaŋ titiŋ. Me nediyeŋ me noli yabukahile hinek tilak adi yadi Bepaŋ'walaŋ wapmihi, doktiŋa adi yadi Bepaŋ agaŋ nadimihinaka tilak. ⁸Me noli yabukahile-kahile diniŋ mebi adi Bepaŋ negoŋ. Unduŋ doktiŋa me nediyeŋ me noli mu yabukahilelak, adi yadi Bepaŋ mu nadimilak.

⁹Bepaŋdi indi nibukahile hinek tilak doktiŋa Mihiniŋ kubugoŋ hinek u indi Hatihati kahilenimdok yoŋa kameune kwetfoloŋ fooŋ mintadakaleguk. ¹⁰Me noli yabukahile-kahile uyadi Bepaŋ'walaŋ titiŋ. Unduŋ doktiŋa timen hinek indi Bepaŋ mu kahilegumun. Mokoŋ. Toboniŋ timen hinek adi Bepaŋdi nibukahileguk. Unduŋ doktiŋa Mihiniŋ kubugoŋ hinek u kameune kwetfoloŋ fooŋ kwetkwet metam hatigumun hogohogok indi'walaŋ kadakaniŋnikdok kibikoŋ kumuŋguk. Unduŋ tiŋa Beu Bepaŋdut welekubugoŋ tiŋa Bepaŋ eŋ metam nihikiulaŋa ne kubugoŋdi me kiukiutnik tuguk hatilak.

¹¹Notneye, Bepaŋdi titiŋniŋ u tuguk wendi indi nibukahile hinek tuguk u miŋilaŋgoŋ hinek tubudakalelak. Unduŋ doktiŋa indi molomolom hinek me noli yabukahile taneem. ¹²Nebek niŋdi Bepaŋ nemu kaguk. Iŋgoŋ oŋ, indi welenikdi notniyedut kihakile nobu tiyanim kaŋ Bepaŋ adi lekiŋgoŋnik gineŋ hatiŋjila weleniŋdi nibukahilelak u miŋgoŋ tubumintaŋ tubufafanelak.

¹³Bepaŋdi Munabuliŋniŋ nimguk kaŋ wendi Bepaŋ ne buŋa indigut galiŋa hatilak kaŋ indi wooŋ adigut galiŋa hatiyam u miŋgoŋ mintadakalelak. ¹⁴Indi Beudi Mihiniŋ kameune kwetfoloŋ fooŋ metam indi'walaŋ Tubulodanik mintaguk u agaŋ kagumun, doktiŋa indi

wendegon medenij yohautayam. ¹⁵Nebek niŋdi “Jesu adi Bepaŋ’walaŋ Mihinjij” unduŋ yolak adi Bepaŋdi me weŋgut buŋa galilak, kaŋ me wendi Bepaŋdut woŋ galilak. ¹⁶Unduŋ doktiŋa indi u nadiŋa indiŋ hinek nadisukilitiyam: Bepaŋ adi nibukahile hinek tilak, kaŋ titinjij wendi indi’walaŋ hatihatiniŋ gineŋ hatak.

Bepaŋ negon me noli yabukahile-kahile diniŋ mebi. Unduŋ doktiŋa me nediyenŋdi me noli yabukahile hinek tilak, adi yadi Bepaŋdut woŋ galilak. Kaŋ Bepaŋdibo buŋa me weŋgut galilak. ¹⁷Bepaŋdi nibukahilelak diniŋ titij u welenik gineŋ foloŋ tubumintadapmaune indi Kilisto ne’walaŋ namandap tiŋa hatiyam. Unduŋ doktiŋa Bepaŋ’walaŋ mede yodapmandapmaŋ nai mintawaak wendok munta mu tineem. ¹⁸Me nediyenŋ Bepaŋdi yabukahile tilak adi yadi munta mu taneenŋ. Bepaŋdi nibukahilelak diniŋ titij u welenik gineŋ foloŋ hinek tubumintadapmaune wendigonŋ munta liliwenekutak. Munta diniŋ mebi adi indiŋ, me niŋdi kadakaninjij diniŋ kibikonŋ malabumuŋ moŋgolaak u agaŋ nadilak, doktiŋa munta tilak. Me niŋ munta tubune kaŋ indiŋ nadiyaneem, me u Bepaŋ’walaŋ titinjijdi hatihatinjij gineŋ fafaŋe hinek mu tilak.

¹⁹Bepaŋdi indi timeŋ nibukahileguk. Unduŋ doktiŋa indibo me noli yabukahileyam. ²⁰Me niŋdi indiŋ binek yobetik, “Nu Bepaŋ kahile hinek tilat,” iŋgonŋ adi Bepaŋ’walaŋ metambop gineneŋ kubugonŋ-kabe nemu kahilelak. Unduŋ doktiŋa me woŋ adi yalaŋ-me niniŋdok. Nebek niŋdi Bepaŋ nemu kaguk. Unduŋ doktiŋa metam agaŋ miŋgonŋ yabulak u mu yabukahilelakdi dedij tiŋa Bepaŋ hebiniŋ nemu kaguk u kahilewek. ²¹Kilisto’walaŋiŋ yodoko mede nadigumun adi indiŋ. Meeneŋ nediyenŋ Bepaŋ kahile hinek tilak, adi yadi Bepaŋ’walaŋ metam maŋ undugonŋ yabukahile hinek tuluwaak.

Jesu Kilisto nadisukilitimindok

5 ¹Metam nediyenŋ “Jesu adi Kilisto” unduŋ yoŋa nadisukilitimiŋ, adi yadi Bepaŋdi hatihati gitipmuŋ tubumintayemulak. Tiŋa metam nediyenŋ Baŋ kahileŋ undugonŋ hinek wapmihinjije maŋ yabukahileyaneenŋ. ²Indi Bepaŋ kahile hinek tiŋa yodoko medenij u takaliyaneem, titij unduŋ tiŋa indi Bepaŋ wapmihinjije yabukahile hinek tam unduŋ nadiyaneem. ³Indi Bepaŋ kahile hinek tiyam doktiŋa yodoko medenij takaliyam. Kaŋ yodoko medenijdi malabumuŋ mu nimilak. ⁴Metam hogohogok Bepaŋdi hatihati gitipmuŋ tubumintayemulak adi yadi kwetfolonŋ diniŋ saŋiniŋ agaŋ ulatifoŋ. Indi Bepaŋ nadisukilitimiyam, tiŋa titij unduŋ folonŋ mik gineŋ fafaŋenŋ kwetfolonŋ kadakanij diniŋ saŋiniŋ ulatifoŋam.

Bepaŋ ne Mihinjij’walaŋ mebi yohautaguk

⁵Meeneŋ nediyenŋ Jesu adi Bepaŋ’walaŋ mihinjij yoŋa nadisukilitimilak, adi yadi kwetfolonŋ kadakanij hatak diniŋ saŋiniŋ ulatifoŋ fafaŋenŋ

kalakapmelak. ⁶ Jesu Kilisto adi talik indij foloŋ buguk: Imeyout titiŋdok, eŋ kolonŋdabek foloŋ nanŋatŋiŋ kwatnedok buguk. Adi Imeyout titiŋdok hogok mu buguk. Mokoŋ. Adi yadi Imeyout eŋ kolonŋdabek foloŋ nanŋatŋiŋ kwatnedok buguk. Uŋŋoniŋ Munabuli adi mede biyagoŋ diniŋ mebi. Unduŋ doktiŋa Uŋŋoniŋ Munabuli ne Jesu Kilisto'walaŋ mebiŋiŋ yohautalak. ⁷ Nemek lufomkultitniŋdi adi'walaŋ mebiŋiŋ yohautaiŋ; ⁸ Uŋŋoniŋ Munabuli, ime eŋ nanŋat. Lufomkultitniŋ adi wanakaŋ mede namandap kubugoŋ uŋakoŋ yohautaiŋ. ⁹ Indi adi medi mede yohautaiŋ u nadiŋa nadisukilitiyam. Eŋ Bepaŋdi mede yohautalak adi medi yoiŋ u yalakapmedapmaŋ tilak. Kaŋ Bepaŋdi mede agaŋ yohautaguk, woŋ adi Mihiniŋdok yoguk.

¹⁰ Metam nediyeŋ Bepaŋ Mihiniŋ nadisukilitimiŋ, adi yadi Bepaŋdi mede yohautaguk u nadidahiune welehiŋ gineŋ hatak. Inŋoŋ me Bepaŋ'walaŋ medeŋiŋ nadidahi hinek mu tilak, adi yadi Bepaŋ yalaŋ-me nilak, unduŋ tilak. Me undiniŋ adi Bepaŋdi Mihiniŋdok mede yohautaguk wendok nadiune folooŋnit mokit tilak. ¹¹ Kaŋ titiŋ unduŋ foloŋ Bepaŋdi medeŋiŋ biyagoŋ u tubudakalelak. Bepaŋdi Hatihati dapmandapmaŋnit mokit nimguk, kaŋ Hatihati woŋ adi Mihiniŋ'walaŋkade hatak. ¹² Me nediyeŋ Bepaŋ Mihiniŋdut woŋ galilak, adi yadi Hatihati u kahilewaak. Eŋ me nediyeŋ Bepaŋ Mihiniŋdut mu woŋ galilak adi yadi Hatihati u mu kahilewaak.

Ninadi eŋ kadakanij diniŋ mede

¹³ Nu metam Bepaŋ Mihiniŋ wou nadiŋa nadisukilitimiŋ hidi Hatihati dapmandapmaŋnit mokit haliwoŋ halaak u agaŋ kahileŋiŋ, u nadidakaleneŋdok mede i youhamulat. ¹⁴ Indi Bepaŋ ne'walaŋ nadinadiŋiŋ binek takaliŋa nemek niŋdok ninadinene adi yonadinik u kadem nadinimilak. Unduŋ doktiŋa indi Bepaŋdok munta mu tiyam. Mokoŋ. Indi adi toboniŋ Bepaŋ'walaŋkade wam. ¹⁵ Adi indi'walaŋ yonadinik hogohogok nadinimilak, u agaŋ nadiyam. Unduŋ doktiŋa indi nemek niŋ nimdok ninadiyam woŋ adi nemek u agaŋ kahilegidibayam.

¹⁶ Me niŋ adi me noliŋiŋdi kadakanij tubune kaŋ nadiluwaak, kadakanij kumuŋ fafaŋeniŋ diniŋ u mu tuguk kaŋ kadem ninadi kwanai tubune Bepaŋdi Hatihati miluwaak. Kadakanij kumuŋ fafaŋeniŋ diniŋ mu tineeŋ adi yadi unduŋ kadem tiyembaak. Tiŋa undugoŋ, kadakanij tiŋa kumuŋ fafaŋeniŋ kahiledok u maŋ uŋgoŋ hatak, inŋoŋ nu kadakanij undiniŋdok ninadi kwanai titiŋdok mu yolat. ¹⁷ Hatihati be titiŋ hogohi hogohogok wanakaŋ adi kadakanij. Inŋoŋ kadakanij noli adi kumuŋ fafaŋeniŋ diniŋ moŋ.

Jesudi momooŋ nibudokolak

¹⁸ Indi agaŋ nadiyam. Me niŋ Bepaŋ'walaŋ mihiŋiŋ hatilak adi yadi titiŋ kadakanij mu tihatilak. Mokoŋ. Adi Bepaŋ Mihiniŋdi momooŋ

hinek kadokoune Me Kadakanin̄di tubugweheyeune kadakanin̄ gineŋ mu mawetik. ¹⁹Indi adi Bepaŋ'walaŋ wapmihin̄ye hatiyam, in̄goŋ metam nadinadihik nemek kwetfoloŋ dinin̄dok hogok hatak, adi wanakaŋ Me Kadakanin̄'walaŋ saŋinin̄ŋin̄di yabudokolak u agaŋ nadiyam. ²⁰Tiŋa indin̄ maan̄ agaŋ nadiyam. Bepaŋ Mihin̄in̄ adi agaŋ buguk, kaŋ indi Bepaŋ folooŋ hinek u nadinimdok nadinadi nimguk. Indi Bepaŋ folooŋ hinek eŋ Mihin̄in̄ Jesu Kilistodut wooŋ galiyam. Jesu Kilisto adi Bepaŋ hinek, tiŋa adi yadi Hatihati dapmandapman̄nit mokit dinin̄ mebi.

²¹Wapmihineye-kabe, hidi bepaŋ yalayalaŋ hekidok sigilulum tiyemaneeŋ.